

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI RABU : 24 NOVEMBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 7, 12 HINGGA NO. 41)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SERI TIONG KING SING
[BINTULU]**

TARIKH : 24 NOVEMBER 2021 (RABU)

SOALAN NO. 7

minta **MENTERI KOMUNIKASI DAN MULTIMEDIA** menyatakan :-

- (a) adakah Kerajaan mengambil perhatian tentang sumber tenaga yang diperlu oleh stesen pangkalan 5G memandangkan sebuah stesen pangkalan 5G perlu dua kali ganda sumber tenaga jika berbanding dengan stesen pangkalan 4G; dan
- (b) apakah usaha Kerajaan dalam menentukan harga dengan perkhidmatan Telco selepas pelan 5G telah dilancarkan.

JAWAPAN

Tuan Yang Dipertua,

Untuk makluman Ahli Yang Berhormat, kadar penggunaan tenaga rangkaian 5G bergantung kepada beberapa faktor termasuk konfigurasi rangkaian, jenis peralatan, bilangan pengguna dan lain-lain. Laporan kajian yang dijalankan oleh pembekal-pembekal peralatan seperti Ericsson dan Nokia mendapati secara amnya, piawaian 5G telah dapat memastikan bahawa kadar penggunaan tenaga sesebuah pemancar 5G adalah lebih rendah dan lebih efisien berbanding mana-mana generasi rangkaian teknologi mudah alih sebelumnya.

SOALAN NO : 7

Perkara ini telah pun diberi perhatian di dalam laporan Pasukan Petugas 5G Malaysia pada tahun 2019. Keperluan tenaga elektrik bagi rangkaian 5G yang dibangunkan oleh Digital Nasional Berhad (DNB) akan menggunakan kadar tenaga elektrik yang lebih rendah berbanding rangkaian 4G sedia ada. Ini adalah kerana secara amnya rangkaian 5G akan menggunakan hanya 2 jalur frekuensi utama (700MHz dan 3.5GHz) berbanding rangkaian 4G yang menggunakan 3 atau 4 jalur frekuensi (900MHz, 1,800MHz, 2,100MHz dan 2,600MHz).

Sistem radio pemancar 5G yang dikenali sebagai 5G New Radio (5G NR) turut mempunyai ciri-ciri penggunaan tenaga yang efisien di mana ia boleh mengaktif dan menyahaktifkan pemancar mengikut keperluan, berbanding pemancar 4G yang sentiasa berada pada keadaan aktif.

Selain itu, pendekatan rangkaian borong tunggal yang diambil Kerajaan juga dapat menangani isu keperluan tenaga elektrik yang tinggi kerana pertindihan infrastruktur telah dapat dielakkan.

Bagi memastikan kos perkhidmatan borong yang ditawarkan berada pada tahap yang munasabah, Suruhanjaya Komunikasi dan Multimedia Malaysia (SKMM) telah menetapkan syarat dalam lesen mengenai tanggungjawab DNB berkaitan harga capaian. Akta Komunikasi dan Multimedia 1998 turut memberi kuasa kepada SKMM untuk menetapkan harga borong melalui Standard Mandatori mengenai Harga Capaian (*Mandatory Standard on Access Pricing*). Ini bagi memastikan harga perkhidmatan borong yang ditawarkan adalah adil dan munasabah dan seterusnya harga runcit untuk perkhidmatan yang ditawarkan kepada pengguna adalah berpatutan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 24 NOVEMBER 2021 (RABU)

SOALAN

TUAN CHAN MING KAI [ALOR SETAR] minta **MENTERI KEWANGAN** menyatakan berkenaan 1 juta pembayar cukai individu yang telah menuntut rebat cukai ke atas bayaran zakat :-

- (a) berapa pembayar cukai yang masih mempunyai baki cukai pendapatan yang perlu dibayar serta jumlah bayaran kepada LHDN mengikut banjaran masing-masing; dan
- (b) berapa pembayar cukai yang tiada baki cukai pendapatan yang perlu dibayar serta jumlah rebat zakat yang telah dituntut.

JAWAPAN

Tan Sri Yang Di-Pertua,

Untuk makluman Ahli Yang Berhormat, berdasarkan tuntutan rebat zakat oleh pembayar cukai individu bagi tahun taksiran 2020, bilangan pembayar cukai yang menuntut rebat zakat dan masih mempunyai baki cukai pendapatan yang perlu dibayar adalah sebanyak 589,583 orang, dan melibatkan baki cukai pendapatan yang perlu dibayar berjumlah 3.5 bilion ringgit.

Pembayar cukai yang menuntut rebat zakat dan tiada baki cukai pendapatan yang perlu dibayar, untuk tahun taksiran yang sama pula, berjumlah 284,540 orang, dengan rebat zakat yang dituntut berjumlah 712 juta ringgit. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI MASLAN
[PONTIAN]**

TARIKH : 24 NOVEMBER 2021 (RABU)

SOALAN

Minta **MENTERI PENGAJIAN TINGGI** menyatakan statistik lepasan peperiksaan SPM (2016-2020), jumlah selama 5 tahun yang menyambung pendidikan ke IPTA/IPTS/TVET/Tingkatan 6 dan apakah usaha jangka pendek dan jangka panjang untuk membantu mereka yang tercicir memiliki hanya kelulusan SPM.

JAWAPAN

Tan Sri Yang di-Pertua,

Statistik jumlah pelajar lepasan SPM yang layak ditawarkan menyambung pengajian ke **Institusi Pengajian Tinggi Awam (IPTA)** bagi tempoh enam tahun dari tahun 2016 sehingga 2021 adalah seperti berikut:

- i) Sesi Akademik 2016/ 2017: 126,492 pelajar;
- ii) Sesi Akademik 2017/ 2018: 155,904 pelajar;
- iii) Sesi Akademik 2018/ 2019: 187,287 pelajar;
- iv) Sesi Akademik 2019/ 2020: 140,343 pelajar;
- v) Sesi Akademik 2020/ 2021: 121,354 pelajar; dan
- vi) Sesi Akademik 2021/ 2022: 141,390 pelajar.

Manakala menurut data Kementerian Pendidikan Malaysian (KPM), **statistik jumlah pelajar lepasan SPM** yang menyambung pengajian bagi **kemasukan ke Tingkatan 6** untuk tempoh 5 tahun iaitu bermula tahun 2016 sehingga tahun 2020 adalah seperti berikut:

- i) SPM Tahun 2016: 46,516 pelajar;
- ii) SPM Tahun 2017: 48,768 pelajar;
- iii) SPM Tahun 2018: 47,514 pelajar;
- iv) SPM Tahun 2019: 50,704 pelajar; dan
- v) SPM Tahun 2020: 53,512 pelajar.

Jumlah **kemasukan pelajar tempatan ke IPTS** bagi tahun 2019, 2020 dan 2021 pula adalah seperti berikut:

- i) Tahun 2019: 160,999 pelajar;
- ii) Tahun 2020: 147,801 pelajar; dan
- iii) Tahun 2021: 115, 819 pelajar (Sehingga Suku Ketiga 2021).

Berkenaan usaha jangka pendek dan jangka panjang untuk membantu mereka yang tercicir memiliki hanya kelulusan SPM, Kementerian aktif dalam menyebarkan luas peluang akses ke pendidikan

tinggi kepada semua lapisan masyarakat. Sebagai contoh, Jabatan Pendidikan Tinggi (JPT) telah menganjurkan **Program Jelajah Vokasional & Pusat Bertauliah di bawah Jabatan Pembangunan Kemahiran (JPK) 2020** melalui pendekatan **norma baharu iaitu melalui platform *FB live***.

Selain itu, pelajar lepasan SPM boleh membuat permohonan ke program pengajian diploma dan sijil yang berunsur TVET dan kemahiran di IPTA dan ILKA yang memerlukan kelayakan yang sangat minimum di mana Jabatan Pendidikan Politeknik dan Komuniti (JPPKK), turut menawarkan program pengajian diploma IPTA di 36 buah Politeknik dan program pengajian sijil IPTA di 104 buah Kolej Komuniti (KK) di seluruh Malaysia.

Kementerian juga bekerjasama dengan empat ILKA di bawah beberapa Kementerian lain yang turut bersama di dalam sistem permohonan UPUOnline yang menawarkan program pengajian diploma dan sijil seperti:

- i. Institusi Latihan Kemahiran Belia dan Sukan (ILKBS), Kementerian Belia dan Sukan (KBS);
- ii. Institusi Latihan Jabatan Tenaga Manusia (ILJTM), Kementerian Sumber Manusia (KSM);
- iii. Bahagian Latihan Kemahiran Pertanian (BLKP), Kementerian Pertanian dan Industri Makanan (MAFI); dan
- iv. Majlis Amanah Rakyat (MARA).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN WONG HON WAI [BUKIT
BENDERA]**

TARIKH : 24 NOVEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan usaha pembaharuan undang-undang yang telah atau sedang diusahakan oleh Kementerian Komunikasi dan Multimedia sejak Mac 2020 dan bilakah pembaharuan tersebut akan dibentangkan di Parlimen.

JAWAPAN

Untuk makluman Ahli Yang Berhormat, berikut merupakan perincian berkenaan pembaharuan undang-undang dan jangka masa pembentanagn di Dewan Rakyat bagi undang-undang yang berada di bawah kawal selia Kementerian Komunikasi dan Multimedia Malaysia (KKMM) dan agensi-agensi di bawahnya.

Bagi undang-undang yang masih di peringkat pindaan, sebanyak empat (4) rang undang-undang, iaitu;

BIL	AKTA	OBJEKTIF PINDAAN	JANGKA MASA PEMBENTANGAN
1.	Akta Komunikasi dan Multimedia 1998 [Akta 588]	- untuk menggalakkan pembangunan industri komunikasi &	Mesyuarat Parlimen tahun hadapan

BIL	AKTA	OBJEKTIF PINDAAN	JANGKA MASA PEMBENTANGAN
		<p>multimedia untuk keperluan masa hadapan;</p> <ul style="list-style-type: none"> - untuk menambah baik aspek keselamatan rangkaian berikutan peningkatan dalam penggunaan dan pergantungan orang ramai terhadap perkhidmatan digital; dan - untuk mengukuhkan pengurusan media baharu termasuk mempunyai pengawasan kawal selia ke atas pemain OTT (<i>over-the-top</i>) dan portal berita dalam talian. 	
2.	Akta Suruhanjaya Komunikasi dan Multimedia Malaysia 1998 [Akta 589]	<ul style="list-style-type: none"> - Penambahbaikan fungsi Suruhanjaya; - Pemisahan peranan Pengerusi dan Ketua Pegawai Eksekutif (KPE); - Penyusunan semula komposisi keanggotaan Suruhanjaya; dan - Pengerusi dan KPE tidak dibenarkan 	Mesyuarat Parlimen tahun hadapan

SOALAN NO : 14

BIL	AKTA	OBJEKTIF PINDAAN	JANGKA MASA PEMBENTANGAN
		menjadi ahli mana-mana badan perundangan.	
3.	Akta Perbadanan Kemajuan Filem Nasional Malaysia 1981 [Akta 244]	Untuk mengkaji peruntukan Akta supaya ia selari dengan perkembangan teknologi dan usaha Kerajaan untuk menambak industri filem di Malaysia.	Mesyuarat Parlimen tahun hadapan
4.	Akta Perlindungan Data Peribadi 2010 [Akta 709]	Memantapkan peruntukan berdasarkan input daripada pihak industri dan amalan-amalan terbaik di peringkat antarabangsa seperti di negara Kesatuan Eropah iaitu General Data Protection Rules (EU-GDPR).	Mesyuarat Parlimen tahun hadapan

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 24 NOVEMBER 2021 (RABU)

SOALAN

**TUAN STEVEN CHOONG SHIAU YOON [TEBRAU] minta MENTERI
TENAGA DAN SUMBER ASLI menyatakan langkah-langkah diambil
oleh Kementerian bagi:-**

- a) memastikan semua pendawaian elektrik yang dikilangkan di Malaysia untuk pasaran tempatan memenuhi piawaian keselamatan yang ditetapkan; dan
- b) apa langkah-langkah kedai-kedai logam supaya tiada pendawaian yang tidak memenuhi piawaian keselamatan tidak dijual kepada rakyat.

JAWAPAN

Tuan Yang di-Pertua,

- a) Kerajaan melalui Suruhanjaya Tenaga (ST) sentiasa mengawal selia keselamatan kelengkapan elektrik sama ada yang diimport atau yang dikilangkan di dalam Malaysia dan yang diedarkan serta dijual untuk pasaran tempatan seperti di kedai-kedai logam. Terdapat sebanyak **34 jenis kategori** kelengkapan elektrik yang dikawal selia oleh ST, termasuklah kabel pendawaian elektrik, dengan izin, **jenis *non-armoured* bersaiz 0.5mm² sehingga 35 mm²** yang lazimnya direkabentuk untuk kegunaan elektrik bervoltan rendah.
- b) ST telah menetapkan perkara-perkara yang perlu dipatuhi oleh pengilang bagi memastikan kabel pendawaian elektrik yang memenuhi piawaian keselamatan sahaja dijual kepada pengguna seperti berikut:
- i) pengilang perlu mendapatkan **Perakuan Kelulusan** daripada ST sebelum kelengkapan elektrik yang dikawal selia boleh dikilang, diimport, dipamer, dijual atau diiklankan;
 - ii) pengilang perlu mendaftarkan syarikat dengan ST dan mendapatkan **Perakuan Pendaftaran** sebagai Pengilang;
 - iii) kabel yang diluluskan adalah kabel yang **telah melalui proses pengujian dan mematuhi standard keselamatan** seperti MS 2112-3 atau IEC 60227-3 dan MS 2112-4 atau IEC 60227-3; dan
 - iv) kabel pendawaian elektrik hendaklah **mematuhi cara penandaan atau pelabelan yang telah ditetapkan** oleh ST, iaitu dengan meletakkan tanda pensijilan SIRIM, piawaian dan saiz kabel serta nama syarikat pengilang.

- c) Selain itu, ST dari semasa ke semasa sentiasa membuat pemantauan dan penguatkuasaan ke atas premis-premis yang mengimport, mengilang, menyimpan atau menjual kelengkapan elektrik yang dikawal selia ST untuk memastikan pematuhan kepada peraturan yang telah ditetapkan. Pada masa yang sama, orang ramai boleh membuat aduan atau menyalurkan maklumat kepada ST melalui pelbagai kaedah seperti sistem eAduan ST, e-mel, surat, dan panggilan telefon sekiranya menemui kelengkapan elektrik yang tidak mematuhi standard keselamatan yang dijual kepada umum.
- d) Pemilik kedai-kedai logam dinasihatkan supaya mengambil langkah-langkah berikut bagi memastikan kabel pendawaian elektrik yang mematuhi piawaian keselamatan sahaja dijual kepada pengguna:
- i) memastikan pembekal menunjukkan Perakuan Kelulusan yang dikeluarkan oleh ST bagi setiap model kabel;
 - ii) menyemak tanda keselamatan yang dilabelkan dengan nama makmal, standard, saiz kabel dan nama pengilang pada kabel tersebut; dan
 - iii) memaklumkan kepada pengguna bahawa kerja-kerja pendawaian elektrik hanya boleh dilakukan oleh individu pemegang sijil kompeten yang dikeluarkan oleh ST sahaja.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN HANNAH YEOH TSEOW SUAN
[SEGAMBUT]**

TARIKH : 24 NOVEMBER 2021 (RABU)

SOALAN

PUAN HANNAH YEOH TSEOW SUAN [SEGAMBUT] minta **MENTERI PEMBANGUNAN WANITA, KELUARGA DAN MASYARAKAT** menyatakan kegagalan menggunakan peruntukan RM30 juta yang telah diperuntukkan bagi tahun 2020 dan 2021 yang mewujudkan taska di tempat kerja bagi agensi Kerajaan terutamanya untuk golongan *frontliners* seperti doktor, jururawat, polis dan guru sekolah.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat sentiasa menyambut baik inisiatif kerajaan yang dapat mempertingkatkan industri pengasuhan di Malaysia bagi menjamin kesejahteraan dan keselamatan kanak-kanak di TASKA.

Belanjawan 2020 dan 2021 menyediakan peruntukan masing-masing berjumlah RM30 juta bagi menambah bilangan TASKA di bangunan kerajaan. Bagi memastikan semua kementerian dan kerajaan negeri mempunyai ruang dan peluang untuk memohon Geran Penubuhan TTKA ini, Kementerian ini telah melaksanakan perkara-perkara berikut:

- i. **Menghantar surat tawaran bagi permohonan geran TTKA kepada semua Ketua Setiausaha Kementerian dan Setiausaha Kerajaan Negeri** pada bulan Disember sebaik sahaja Cadangan Bajet diluluskan.
- ii. **Mengadakan taklimat permohonan geran dan penubuhan TASKA di Tempat Kerja** kepada semua agensi kerajaan persekutuan dan negeri pada 24 Disember 2020.
- iii. **Tempoh permohonan geran juga dibuka selama 5 bulan** mulai Disember sehingga April.
- iv. **Taklimat turut diadakan di peringkat Jabatan Kebajikan Masyarakat Negeri** kepada semua agensi kerajaan berserta khidmat nasihat dari semasa ke semasa kepada yang berminat untuk memohon geran dan menubuhkan TASKA di Tempat Kerja.

Pada tahun 2020, sebanyak dua kali Mesyuarat Pengurusan dan Penilaian Geran Penubuhan TASKA di Tempat Kerja telah diadakan untuk meluluskan permohonan geran dari Kementerian dan Kerajaan Negeri. Hasil mesyuarat, sebanyak 30 agensi kerajaan diluluskan geran penubuhan dengan peruntukan RM4.646 juta (RM4,646,529.00).

Pada tahun 2021, Mesyuarat Pengurusan dan Penilaian Geran Penubuhan TASKA di Tempat Kerja telah dilaksanakan sebanyak tiga kali dan telah meluluskan 72 permohonan oleh agensi kerajaan dengan peruntukan berjumlah RM6.995 juta. Pecahan kelulusan adalah melibatkan 30 TASKA baharu ditubuhkan dengan nilai RM4.364 juta dan penyelenggaraan 42 buah TASKA sedia ada dengan jumlah RM2.63 juta. Pemberian geran bagi penyelenggaraan TASKA sedia ada adalah bertujuan untuk memastikan keselamatan dan merangsang perkembangan menyeluruh kanak-kanak yang berada di TASKA.

Walau bagaimanapun, permohonan yang diterima adalah tidak mencapai sasaran disebabkan perkara-perkara berikut:

- i. **Kesediaan Kementerian dalam penubuhan TASKA di Tempat Kerja.** Pengurusan Geran TASKA di Tempat Kerja adalah berdasarkan permohonan oleh kementerian lain. Terdapat kementerian yang belum bersedia untuk mengemukakan permohonan kerana ketiadaan ruang bagi penubuhan TASKA di premis kerajaan kerana premis bangunan pejabat yang lama tidak disediakan ruang khas dan tidak mempunyai ruang yang mencukupi dan bersesuaian untuk dijadikan TASKA serta tiada permintaan dari kalangan kakitangan agensi kerana penghantaran anak-anak ke TASKA yang berhampiran tempat tinggal adalah lebih mudah.
- ii. **Perintah Kawalan Pergerakan** ini merupakan satu kekangan untuk pelaksanaan penubuhan TASKA di Tempat Kerja kerana kerja-kerja penubuhan dan penyelenggaraan terpaksa ditangguhkan mengikut SOP Pelan Pemulihan Negara yang dikeluarkan dari semasa ke semasa. Ini menyebabkan terdapat agensi kerajaan yang memulangkan peruntukan yang telah diluluskan kerana tidak dapat dibelanjakan dalam tahun semasa; dan
- iii. **Kelulusan penubuhan sesebuah TASKA di Tempat Kerja juga melibatkan beberapa agensi teknikal** dalam memenuhi tatacara Penubuhan TASKA di premis kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 24 NOVEMBER 2021

SOALAN

DATUK WILSON UGAK ANAK KUMBONG [HULU RAJANG] minta **MENTERI PERTANIAN DAN INDUSTRI MAKANAN** menyatakan adakah Kementerian mempunyai sebarang perancangan kerjasama bagi membangunkan industri skim padi di Nanga Merit dan di Sungai Tunoh, Baleh Kapit.

JAWAPAN

Tuan Yang Di Pertua,

Untuk makluman Ahli Yang Berhormat, Skim Pengairan Nanga Merit terletak di daerah Kapit berkeluasan 159 hektar melibatkan sebanyak lima belas (15) buah rumah panjang yang berada di sekitar skim berkenaan. Skim ini telah dibangunkan oleh Jabatan Pengairan Dan Saliran Sarawak (DID) dan dilengkapi dengan kemudahan infrastruktur pengairan primer dan sekunder. Sehingga kini, penanaman padi di Skim Pengairan Nanga Merit masih dilaksanakan sekali setahun oleh 82 orang pesawah. Antara varieti tradisional yang ditanam bagi kegunaan sara diri sahaja ialah Gemala, Wangi, Bario, Pulut, Saga dan Lemak.

Produktiviti pengeluaran padi di kawasan Skim Padi Nanga Merit adalah rendah berikutan faktor usia dan kesihatan pesawah serta

SOALAN NO : 17

penghijrahan golongan muda keluar dari rumah panjang. Jabatan Pertanian Sarawak ketika ini sedang dalam usaha untuk mengenalpasti pihak swasta/agensi yang berminat untuk melaksanakan projek usahasama bagi mengusahakan kawasan tersebut.

Bagi kawasan Sungai Tunoh pula, kawasan seluas 178 hektar telah dikenalpasti sesuai bagi penanaman padi. Kawasan ini telah dirancang untuk dibangunkan dengan kemudahan infrastruktur pengairan dan saliran bagi tujuan penanaman padi dua (2) kali setahun. Setelah siap kelak, projek ini dijangka akan memberi manfaat kepada enam (6) buah rumah panjang di sekitar kawasan berkenaan.

Di bawah Rancangan Malaysia Kedua Belas (RMKe-12), kedua-dua skim ini telah dirancang untuk dibangunkan bagi tujuan penanaman padi sebanyak dua (2) kali setahun. Anggaran kos keseluruhan bagi pembangunan infrastruktur tersier di Skim Pengairan Nanga Merit adalah sebanyak RM9.38 juta. Bagi kawasan Sungei Tunoh, anggaran kos pembangunan bagi kawasan tersebut adalah RM38 juta yang merangkumi pembinaan infrastruktur primer, sekunder dan tersier.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB TUAN NOOR AMIN BIN AHMAD [KANGAR]

TARIKH : 24 NOVEMBER 2021 (RABU)

SOALAN

TUAN NOOR AMIN BIN AHMAD [KANGAR] minta **MENTERI PELANCONGAN, SENI DAN BUDAYA** menyatakan jumlah pelancong mengikut jenis produk pelancongan dan anggaran perbelanjaan mereka bagi setiap jenis produk pelancongan ini.

JAWAPAN

Tuan Yang di-Pertua,

1. Ketibaan pelancong asing ke Malaysia pada tahun 2020 adalah berjumlah 4.3 juta pelancong, iaitu turun 83.4% berbanding 26.1 juta pelancong pada 2019. Ini adalah rentetan daripada penutupan pintu sempadan negara untuk tujuan pelancongan selaras dengan pelaksanaan Perintah Kawalan Pergerakan dalam membendung penularan COVID-19.
2. Data yang dijana oleh Tourism Malaysia melaporkan penjaan pendapatan daripada pelancong asing juga telah menyusut akibat pengurangan kehadiran pelancong asing ini, iaitu sebanyak 85.3%, dengan nilai RM12.69 bilion pada tahun 2020 berbanding RM86.14 bilion pada 2019.
3. Komponen perbelanjaan pelancong pada tahun 2020 yang tertinggi adalah daripada aktiviti membeli-belah iaitu sebanyak RM4.48 bilion, diikuti penginapan sebagai komponen kedua tertinggi berjumlah RM2.96 bilion. Manakala makanan dan minuman menyumbang kepada komponen ketiga tertinggi dengan jumlah RM1.85 bilion.
4. Sementara itu, pecahan komponen-komponen lain perbelanjaan pelancong termasuklah pengangkutan tempatan sebanyak RM920.5 juta, lawatan yang terancang sebanyak RM602.4 juta, hiburan sebanyak RM351.4 juta dan perubatan sebanyak RM351.4 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DATO' HAJI MOHD. SALIM SHARIFF
[JEMPOL]**

TARIKH : 24 NOVEMBER 2021 (RABU)

SOALAN

Minta **MENTERI PENGAJIAN TINGGI** menyatakan bilangan peminjam yang masih berhutang dengan Perbadanan Tabung Pendidikan Tinggi Nasional (PTPTN) dan jumlah kewangan yang terlibat.

JAWAPAN

Tan Sri Yang di-Pertua,

Sehingga 30 September 2021, PTPTN telah meluluskan pinjaman kepada lebih 3.5 juta peminjam dengan jumlah pengeluaran (*disbursement*) lebih RM64.8 bilion. Daripada jumlah tersebut, seramai 2,424,009 orang peminjam telah menamatkan pengajian dan patut mula membayar balik pinjaman mereka yang berjumlah hampir RM24.6 bilion.

Namun demikian, daripada jumlah tersebut seramai 1,884,725 orang peminjam iaitu 77.75% telah membuat bayaran balik; di mana 751,216 peminjam telah menyelesaikan pinjaman; 427,861 peminjam sedang membuat bayaran balik secara konsisten mengikut jadual bayaran balik; dan 705,648 peminjam membuat bayaran balik namun secara tidak konsisten. Walau bagaimanapun, masih terdapat seramai 539,284 peminjam iaitu 22.25% tidak pernah membuat bayaran balik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN CHAN FOONG HIN
[KOTA KINABALU]**

TARIKH : 24 NOVEMBER 2021 (RABU)

SOALAN

TUAN CHAN FOONG HIN [KOTA KINABALU] minta **MENTERI PERTANIAN DAN INDUSTRI MAKANAN** menyatakan status penyediaan *National Agrofood Policy 2021-2030*. Apakah usaha Kementerian meningkatkan produktiviti pengeluaran makanan *aquaculture* di Sabah dan nyatakan hatcheries bagi spesies makanan laut seperti *sea bass*, kerapu, timun laut, rumput laut, *abalone* dan tiram di Sabah.

JAWAPAN

Tuan Yang Di Pertua,

Untuk makluman Ahli Yang Berhormat, Dasar Agromakanan Negara 2021-2030 (DAN 2.0) atau dengan izin, *National Agrofood Policy 2021-2030* merupakan dasar baharu yang akan menjadi sumber rujukan dan panduan utama kepada semua pihak berkepentingan termasuk Kerajaan Negeri untuk membangunkan sektor agromakanan bagi tempoh 10 tahun akan datang. DAN 2.0 telah diluluskan oleh Jemaah Menteri pada 11 Ogos 2021 dan dilancarkan secara rasmi pada 25 Oktober 2021 oleh Yang Amat Berhormat Perdana Menteri.

Di bawah DAN 2.0, sektor perikanan dan akuakultur merupakan salah satu tumpuan utama yang akan diberikan penekanan untuk meningkatkan produktiviti dan pendapatan nelayan serta penternak akuakultur. Dalam hal ini, Kementerian bekerjasama dengan Kerajaan Negeri melalui Jabatan Perikanan Sabah telah melaksanakan pelbagai usaha untuk meningkatkan pengeluaran hasil perikanan di Sabah termasuk melalui akuakultur marin seperti berikut:

- a) mewujudkan projek-projek baharu dengan meningkatkan keupayaan ladang ternakan;
- b) memberi bimbingan dan latihan kepada para pengusaha akuakultur marin khususnya pengusaha berskala kecil tentang kaedah pengurusan projek yang lebih cekap dan pengetahuan teknikal serta menggalakan penggunaan amalan ternakan secara intensif dan bersepadu;
- c) menjalankan aktiviti akuakultur marin secara sektoral melalui pengezonan;
- d) menggiatkan aktiviti penternakan akuakultur daripada sara diri (skala kecil) kepada skala lebih ekonomik (komersial);

- e) menggalakkan penglibatan sektor swasta untuk aktiviti penternakan akuakultur; dan
- f) mempergiat penggunaan sistem berteknologi yang memberi impak yang lebih baik.

Dari segi hatcheri, Pusat Pembenihan Ikan Marin Sabah di bawah Jabatan Perikanan Sabah yang terletak di Tg. Badak, Tuaran adalah satu satunya hatcheri marin yang berperanan:

- a) melaksana dan menyelaras program dan aktiviti pembenihan ikan marin di Negeri Sabah;
- b) menyediakan dan menyelaras perkhidmatan sokongan teknikal kepada pengusaha-pengusaha hatcheri marin; dan
- c) merancang, melaksana dan menyelaras program dan aktiviti pembangunan modal insan kepada pengusaha dan bakal pengusaha hatcheri marin.

Aktiviti pembenihan yang dijalankan di pusat pembenihan ini termasuk spesies ikan siakap, kerapu hibrid, timun laut, ketam dan abalon.

Selain hatcheri Jabatan Perikanan Sabah, terdapat 24 hatcheri swasta di Sabah yang menjalankan pembenihan ikan / udang / ketam seperti Akuajaya Enterprise, Borneo Marine Grouper Sdn. Bhd., Better Prospects Sdn. Bhd., Ocean Supplies Enterprise, Borneo Scabra dan sebagainya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD JOHNNIE BIN ZAWAWI
[IGAN]**

TARIKH : 24 NOVEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan sejauh manakah perancangan jangka pendek dan jangka panjang Kementerian bagi memastikan capaian internet yang pantas di Sarawak khususnya di kawasan luar bandar yang capaian internetnya masih lemah dan tiada langsung.

JAWAPAN

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (SKMM) telah mengambil beberapa inisiatif dalam menghasilkan Pelan Jalinan Digital Negara (JENDELA), sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih.

Antara inisiatif untuk menambahbaik infrastruktur digital di Sarawak melalui Pelan Jalinan Digital Negara (JENDELA) di bawah Fasa 1 setakat 31 Oktober 2021 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Pelaksanaan	Siap
Sarawak	823	79	3,012	1,856	73,588	61,414	523	-

Secara umumnya, pelaksanaan kesemua inisiatif JENDELA ini telah bermula sejak bulan September 2020 dan inisiatif yang dalam perancangan akan siap secara berperingkat sehingga penghujung tahun 2022. Manakala bagi perkhidmatan jalur lebar menggunakan teknologi satelit kini dalam proses pelaksanaan dan dijangka akan siap secara berperingkat bermula November 2021 sehingga awal tahun 2022.

Untuk makluman Ahli Yang Berhormat, peratusan liputan 4G di kawasan berpenduduk di Sarawak telah meningkat kepada 81.37% pada suku ketiga 2021 berbanding 73.67% sebelum pelaksanaan JENDELA pada suku kedua 2020. Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh Rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktaraf serta premis-premis yang mendapat akses gentian optik bagi memastikan keperluan Rakyat sentiasa diutamakan.

Para pengguna digalakkan untuk melayari portal *JENDELA Map* (<https://jendela.my>) yang telah dilancarkan pada Julai lepas, bagi melaporkan lokasi yang kurang mendapat liputan agar boleh dimasukkan ke dalam perancangan masa hadapan. Maklumat yang diperolehi daripada pengguna secara terus secara sumber khalayak atau *crowdsourcing*, dapat digunakan sebagai maklumat bagi membuat perancangan penambahbaikan liputan dan kualiti perkhidmatan jalur lebar dari semasa ke semasa.

Kesemua inisiatif ini memerlukan kerjasama serta tindakan beberapa pihak berkepentingan lain terutamanya pihak Kerajaan Negeri. SKMM akan terus bekerjasama dengan agensi kerajaan negeri iaitu Sarawak Multimedia Authority (SMA) bagi menambahbaik liputan dan kualiti jalur lebar di Sarawak untuk mengenalpasti keperluan dan menyelaraskan inisiatif jalur lebar di negeri Sarawak bagi mengelakkan pertindihan lokasi pelaksanaan.

Tuan Yang Dipertua,

Selain daripada pembinaan menara-menara telekomunikasi dan satelit, Pihak Kerajaan akan turut melaksanakan Penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

SOALAN NO : 21

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Pelaksanaan PoP bagi Fasa 1 akan melibatkan 630 lokasi berhampiran sekolah manakala bagi Fasa 2 pula akan melibatkan 3,693 lokasi berhampiran sekolah di kawasan luar bandar di seluruh negara.

Sekurang-kurangnya sebanyak 432,300 premis akan menerima perkhidmatan jalur lebar berkelajuan tinggi apabila projek ini siap menjelang akhir RMK-12 Tahun 2025. Keseluruhan jumlah PoP di kawasan luar bandar di negeri Sarawak adalah sebanyak 741 dan daripada jumlah tersebut pula sebanyak 31 adalah di Parlimen Igan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 24 NOVEMBER 2021 (RABU)

SOALAN

minta **MENTERI PENGAJIAN TINGGI** menyatakan bagaimana proses pelantikan seorang Ahli Lembaga Pengarah Universiti dibuat. Adakah Persatuan Alumni dan Senat universiti dilibatkan. Atau adakah ia berdasarkan autonomi universiti sepenuhnya.

JAWAPAN

Tan Sri Yang di-Pertua,

Merujuk kepada Peraturan 14(1), Jadual Pertama, Akta Universiti dan Kolej Universiti 1970 (Akta 30), “Pelantikan ahli Lembaga, kecuali Naib Canselor, hendaklah dibuat oleh Menteri bagi tempoh tiga tahun dan apabila habis tempoh itu, ahli Lembaga itu layak dilantik semula”. Manakala Seksyen 13(1) Akta 30 pula menetapkan komposisi keahlian LPU hendaklah mewakili kelompok tertentu yang dapat membantu Lembaga melaksanakan fungsi dengan berkesan. Justeru, selain wakil-wakil Perkhidmatan Awam yang terdiri daripada pegawai kanan Kementerian Pengajian Tinggi dan Kementerian Kewangan yang bertindak sebagai pemegang taruh utama Universiti Awam, pelantikan Ahli LPU perlu menepati komposisi yang termaktub di bawah Akta 30 iaitu:

i) Pengerusi LPU

Calon mempamerkan daya kepimpinan dan keupayaan pengurusan yang cemerlang, berperibadi unggul, dihormati oleh masyarakat, mempunyai tahap integriti serta akauntabiliti yang tinggi dan telah memberikan banyak sumbangan kepada negara.

ii) Wakil Masyarakat Setempat

Calon dilantik dalam kalangan pemimpin masyarakat setempat atau berasal dari negeri lokasi UA berkenaan.

iii) Wakil Senat

Seorang profesor Universiti yang dipilih oleh Senat daripada kalangan ahli yang disebut dalam Peraturan 17(d) Jadual Pertama Akta 30.

iv) Wakil Sektor Swasta

Calon berpengalaman luas dalam selok-belok tadbir urus organisasi, mempunyai kelayakan akademik atau pengalaman yang bersesuaian dengan bidang tujahan universiti yang diwakili, mampu menyuntik perspektif baru dalam kepemimpinan

organisasi dan pengumpulan dana serta berupaya memperkuat jaringan dengan pihak industri dan membantu menerapkan amalan tadbir urus korporat yang baik (*Good Corporate Governance*) dalam pentadbiran universiti.

v) Wakil Alumni

Calon adalah seorang tokoh yang boleh menjadi contoh ikutan kepada warga universiti khususnya para pelajar dan mampu menggerakkan usaha dalam pengumpulan dana universiti melalui jaringan perhubungan dengan alumni.

vi) Wakil Berpengetahuan dan Berpengalaman

Calon dilantik berdasarkan pengetahuan dan pengalaman dalam bidang tertentu yang bersesuaian dengan bidang tujuan universiti.

Selaras dengan autonomi yang telah diberikan kepada Universiti Awam, Kementerian Pengajian Tinggi juga telah menghasilkan *University Transformation Program (UniTP) Greenbook: Enhancing University Board Governance and Effectiveness* sebagai panduan untuk memperkasakan lagi peranan Lembaga Pengarah Universiti termasuk dalam urusan pencalonan Ahli LPU.

Dalam hubungan ini, sebahagian Universiti Awam menubuhkan Jawatankuasa Pencalonan (*Nomination Committee*) dan sebahagian yang lain dikenal pasti oleh Lembaga Pengarah Universiti berdasarkan kesesuaian komposisi sebelum cadangan pelantikan dikemukakan kepada pihak Kementerian. Selain itu, pihak universiti diberikan kebebasan untuk mengadakan sesi libat urus dengan Persatuan Alumni bagi tujuan pencalonan wakil alumni, manakala pencalonan wakil Senat pula akan melalui proses undian dalam kalangan Ahli Senat. Kepelbagaian latar belakang profesional dan pengalaman ahli LPU yang dilantik di sesebuah universiti juga turut diambil kira sebelum sebarang pelantikan dimuktamadkan .

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 24 NOVEMBER 2021 (RABU)

SOALAN

TUAN SHAHARIZUKIRNAIN BIN ABD. KADIR (SETIU) minta **MENTERI PERTANIAN DAN INDUSTRI MAKANAN** menyatakan secara terperinci langkah mengatasi masalah rantai bekalan bagi isu lambakan buah-buahan dan sayur-sayuran.

JAWAPAN

Tuan Yang Di Pertua,

Untuk makluman Ahli Yang Berhormat, isu lambakan buah-buahan dan sayur-sayuran berlaku disebabkan oleh *mismatch* antara bekalan dan permintaan dalam pasaran. Sebagai contoh, dalam tempoh Perintah Kawalan Pergerakan, limitasi pengoperasian sektor perhotelan, restoran dan katering telah menyebabkan permintaan daripada sektor ini merosot dengan ketara dan ini seterusnya menyebabkan lambakan berlaku. Bagi mengatasi isu ini, Kementerian Pertanian dan Industri Makanan (MAFI) bersama agensi-agensi pemasaran MAFI telah melaksanakan beberapa inisiatif seperti berikut:

- i. Menggalakkan petani-petani berdaftar di bawah Program Khidmat Pemasaran MAFI yang dilaksanakan oleh Lembaga Pemasaran Pertanian Persekutuan (FAMA), Lembaga Pertubuhan Peladang (LPP), Lembaga Perindustrian Nanas Malaysia (LPNM) dan Lembaga Kemajuan Ikan Malaysia (LKIM). Melalui program ini, para petani akan dibantu untuk memasarkan tanaman mereka samada melalui pengaturan pasaran, pepadanan perniagaan atau perjanjian *Forward Agreement* dengan FAMA mahupun LPP. Sehingga 30 Oktober 2021, seramai 1,424 orang petani telah menyertai program ini dengan nilai jualan sebanyak RM109,227,539. 827 *Forward Agreement* yang bernilai sebanyak RM18,799,114 telah ditandatangani bersama FAMA manakala sebanyak 131 *Forward Agreement* telah ditandatangani bersama LPP dengan nilai sebanyak RM420,082;
- ii. MAFI juga telah membangunkan usahawan outlet peruncitan seperti Pasar Tani Kekal (PTK), Agrobazaar Kedai Rakyat (AKR) dan Agrobazaar Rakyat (ABR) sebagai ruang pasaran alternatif kepada petani. Sehingga 31 Oktober 2021, terdapat 21 Pasar Tani Kekal, 326 Agrobazaar Kedai Rakyat dan 165 Agrobazaar Rakyat di seluruh Malaysia. Di samping itu, terdapat terdapat 329 Gerai Buah-Buahan Segar dan 312 Pasar Tani di seluruh Malaysia;

- iii. Membangunkan industri hiliran bagi produk sayur-sayuran dan buah-buahan yang bersesuaian. Sebagai contoh, durian sejuk beku sama ada dalam bentuk pes, *pulp* atau *whole fruit* dan tempoyak. Bagi pengeluaran buah bermusim terutamanya durian kampung, FAMA mempunyai 11 Pusat Memproses Buah-Buahan berakreditasi di seluruh negara. Selain itu, terdapat 2 buah pusat pemprosesan durian sejuk beku yang mendapat akreditasi *General Administration of Custom China* (GACC) serta berstatus *Good Manufacturing Practices* (GMP) dan Halal. Pada masa yang sama, FAMA turut mempunyai fasiliti pemprosesan makanan bertaraf *Hazard Analysis Critical Control Point* (HACCP) yang menyediakan perkhidmatan kepada usahawan bagi pengeluaran produk secara *Original Equipment Manufacturing* (OEM). Selain fasiliti yang disediakan, MAFI turut memberikan khidmat nasihat dan bimbingan produk bagi persijilan HALAL, MESTI, HACCP dan GMP kepada usahawan; dan
- iv. MAFI juga sedang menggiatkan usaha untuk memperkukuhkan pemasaran produk pertanian melalui platform e-dagang sebagai saluran pemasaran alternatif kepada para petani. Bagi tujuan itu, beberapa program kerjasama dengan pihak industri telah dilaksanakan. Antaranya termasuk kerjasama dengan Shopee, Lazada, AirAsia Farm, Grab, Food Panda serta beberapa platform digital baharu seperti e-Agro. Dalam masa yang sama, MAFI juga menggalakkan para petani memasarkan hasil pertanian menggunakan platform e-dagang Agrobazaar Online (ABO) yang telah ditambahbaik. Petani yang berminat untuk menyertai ABO akan diberi latihan untuk menguruskan transaksi jualan atas talian. Sehingga 31 Oktober 2021, seramai 6,107 usahawan telah berdaftar di platform ABO dengan transaksi jualan berjumlah RM9.1 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG (TANJONG MALIM)

TARIKH : 24 NOVEMBER 2021 (RABU)

SOALAN

TUAN CHANG LIH KANG (TANJONG MALIM) minta **MENTERI KANAN PENDIDIKAN** menyatakan jumlah kanak-kanak Orang Asli yang tidak menghabiskan tempoh persekolahan sehingga Tingkatan 5.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk mengurangkan kadar keciciran murid di negara ini termasuk murid Orang Asli. KPM mendefinisikan keciciran daripada sistem pendidikan sebagai situasi di mana murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat/menghabiskan tempoh pendidikan.

Untuk makluman Ahli Yang Berhormat, sebanyak 58.62 peratus murid Orang Asli yang tidak menamatkan persekolahan sehingga ke Tingkatan 5 bagi tahun 2020. Bagi tahun 2021 pula, sebanyak 42.29 peratus murid Orang Asli yang tidak menamatkan persekolahan sehingga ke Tingkatan 5.

KPM kekal komited dalam memberi perhatian terhadap pendidikan murid Orang Asli dan berusaha memastikan mereka terus mendapat akses kepada pendidikan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 24 NOVEMBER 2021 (RABU)

SOALAN

DATO' JOHARI BIN ABDUL (SUNGAI PETANI) minta **MENTERI KANAN PENDIDIKAN** menyatakan adakah Kementerian bercadang melahirkan rakyat Malaysia yang boleh bertutur dalam pelbagai bahasa lain selain dari Bahasa Kebangsaan dan Bahasa Ibunda mereka. Jika telah ada usaha ke arah ini, apa kejayaannya.

JAWAPAN

Tuan Yang di-Pertua,

Kementerian Pendidikan Malaysia (KPM) menawarkan mata pelajaran bahasa antarabangsa iaitu Bahasa Perancis, Bahasa Jepun, Bahasa Jerman, Bahasa Korea, Bahasa Arab Komunikasi dan Bahasa Cina Komunikasi sebagai mata pelajaran elektif. Mata pelajaran ini ditawarkan kepada semua murid di Sekolah Menengah Kebangsaan (SMK), Sekolah Menengah Kebangsaan Agama (SMKA) dan Sekolah Menengah Berasrama Penuh (SBP) yang terpilih bermula daripada Tingkatan 1 hingga Tingkatan 5. Kemahiran berbahasa yang diajar adalah kemahiran mendengar, bertutur, membaca, dan menulis yang merupakan teras kepada penguasaan bahasa.

Untuk makluman Ahli Yang Berhormat, bagi menilai keberkesanan penguasaan murid dalam semua mata pelajaran tersebut, KPM melaksanakan Pentaksiran Bilik Darjah (PBD). Murid Tingkatan 5 menduduki Ujian Pencapaian Bahasa Antarabangsa (UPBA) bagi bahasa Jepun dan bahasa Jerman. Mengikut rekod semasa, murid yang lulus dalam UPBA Bahasa Jepun tahun 2020 adalah melebihi 60 peratus. Bagi UPBA bahasa Jerman tahun 2020 pula, murid yang lulus adalah melebihi 98 peratus. Selain itu, murid yang mengambil bahasa Perancis pula menduduki *Diplôme d'Étude en Langue Française (DEL F)*. Bagi tahun 2019, keputusan ujian ini menunjukkan bahawa 95.4 peratus murid telah lulus.

Selain pengajaran dan pembelajaran dalam bilik darjah, penguasaan bahasa ini diperkukuhkan melalui penyertaan murid dalam pelbagai program sokongan dan aktiviti pendidikan yang dianjurkan oleh KPM dan agensi luar seperti, *Japan Foundation*, *Goethe-Institut*, *Alliance Française*, *Sejong Institute* dan lain-lain pada peringkat antarabangsa.

Mempelajari pelbagai bahasa ini dapat mendedahkan murid dengan aspek Kewarganegaraan Global seterusnya meningkatkan jati diri dan semangat patriotisme serta rasa kecintaan kepada budaya sendiri.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 24 NOVEMBER 2021 (RABU)

SOALAN

Minta **MENTERI PENGAJIAN TINGGI** menyatakan apakah kursus yang terdapat di kolej-kolej komuniti yang ada pada masa ini menepati pasaran semasa. Apakah pelan tindakan Kementerian bagi menjamin kelestarian kursus-kursus yang ditawarkan.

JAWAPAN

Tan Sri Yang di-Pertua,

Penubuhan Politeknik dan Kolej Komuniti pada dasarnya berperanan menyediakan akses yang meluas kepada program TVET yang berkualiti dan diiktiraf, selain memperkasa komuniti melalui pembelajaran sepanjang hayat (PSH) dan melahirkan graduan holistik berciri keusahawanan dan seimbang. Secara keseluruhannya, terdapat 104 buah Kolej Komuniti yang menawarkan 67 program pengajian sepenuh masa, yang terdiri daripada 16 program diploma dan 42 program sijil melibatkan enam (6) bidang utama pengajian iaitu:

- i. Sains, matematik dan komputer
- ii. Sains sosial perniagaan dan perundangan
- iii. Sastera kemanusiaan
- iv. Perkhidmatan
- v. Kejuruteraan pembuatan dan pembinaan
- vi. Pertanian dan veterinar

SOALAN NO : 26

Dalam hal ini, Jabatan Pendidikan Politeknik dan Kolej Komuniti (JPPKK) bertanggungjawab untuk menawarkan kursus yang berkualiti dan memenuhi keperluan semasa. Antara inisiatif bagi mencapai objektif tersebut adalah melalui Kajian Keperluan Program/ *Programme Need Analysis* (PNA). PNA merangkumi maklum balas industri dan profesional yang berkepentingan, pelajar, alumni dan pensyarah daripada pelbagai pihak dalam bidang berkaitan. Ia juga mengandungi maklumat berkaitan implikasi keperluan sumber manusia, fizikal dan unjuran pelajar serta keperluan dasar negara yang digunakan sebagai maklumat utama untuk membuat keputusan penawaran program pengajian.

Berdasarkan laporan PNA, hanya program yang menepati pasaran semasa akan diangkat untuk proses penawaran di Mesyuarat Penjajaran Program Politeknik dan Kolej Komuniti. Laporan penambahbaikan berterusan dilaksanakan di peringkat institusi dan tindakan penambahbaikan turut dilaksanakan bagi menjamin kelestarian program-program yang ditawarkan di Kolej Komuniti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : TUAN SYED SADDIQ
BIN SYED ABDUL RAHMAN [MUAR]**

TARIKH : 24 NOVEMBER 2021 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan apa langkah kerajaan untuk menangani keadaan simpanan 5.8 juta pencarum KWSP bawah 55 tahun yang dalam simpanan mereka berbaki kurang daripada RM10,000. Adakah Kerajaan bercadang untuk menubuhkan dana atau program ekonomi khas yang akan membantu golongan ini menjana pendapatan lebihan bagi meningkatkan kembali simpanan mereka.

JAWAPAN

Tuan Yang di-Pertua,

Untuk makluman Ahli Yang Berhormat, setakat 30 September 2021, seramai 5.87 juta atau 46.4 peratus ahli KWSP di bawah umur 55 tahun mempunyai simpanan RM10,000 dan kurang. Menyedari situasi ini, pelbagai langkah dan inisiatif telah, sedang dan akan dijalankan oleh KWSP bagi membantu ahli-ahlinya mempunyai simpanan persaraan yang mencukupi apabila bersara kelak.

Penambahbaikan berterusan Skim KWSP

Selaras dengan usaha bagi membantu ahli meningkatkan kecukupan simpanan persaraan tersebut, penambahbaikan berterusan ke atas Skim KWSP telah dilaksanakan seperti berikut:-

- i. Pengeluaran Umur 55 Tahun dan Pengeluaran Umur 60 Tahun yang lebih fleksibel di mana ahli boleh membuat pilihan bayaran pengeluaran sama ada secara sekaligus, bulanan, dividen tahunan sahaja atau apa-apa amaun pada bila-bila masa. Ini bertujuan untuk menggalakkan ahli memilih bayaran pengeluaran secara berkala atau bulanan. Dengan ini, simpanan ahli akan terus menerima dividen tahunan dan dapat bertahan dengan lebih lama;
- ii. Tempoh tanggungan mencarum iaitu ahli dan majikan wajib mencarum sehingga umur 75 tahun, sekiranya ahli masih bekerja;
- iii. Bagi menggalakkan ahli terus kekal aktif bekerja dan majikan mengambil pekerja berumur 60 tahun dan ke atas, KWSP tidak mengenakan apa-apa caruman kepada pekerja, manakala, majikan diwajibkan mencarum hanya sebanyak 4%;
- iv. Memperkenalkan i-Saraan bagi membolehkan golongan yang bekerja sendiri atau mereka yang tiada pendapatan tetap mencarum secara sukarela kepada KWSP. Sebagai insentif, Kerajaan menyumbang 15% daripada caruman, tertakluk kepada jumlah maksimum RM250 setahun;
- v. Memperkenalkan I-Suri bagi bertujuan untuk menjaga kebajikan golongan wanita khususnya suri rumah, dengan matlamat menyediakan simpanan untuk kegunaan hari tua. I-Suri ialah program caruman sukarela bagi Ketua Isi Rumah (KIR) wanita atau isteri kepada KIR yang berdaftar dengan Pengkalan Data Kemiskinan Nasional (e-Kasih) yang mendapat insentif persaraan daripada Kerajaan sebanyak RM480 setahun dengan caruman minimum RM60 setahun; dan
- vi. KWSP juga akan memperkenalkan pengeluaran baharu pada tahun ini untuk membolehkan ahli membeli produk insurans atau takaful, seperti yang diumumkan dalam Belanjawan 2021. Pengeluaran ini dijangka akan memberi manfaat untuk perlindungan diri sendiri dan keluarga bagi penyakit kritikal dan kematian.

Langkah-langkah mengembalikan simpanan ahli KWSP

Dalam usaha membaik pulih simpanan ahli yang telah membuat pengeluaran i-Sinar dan i-Citra daripada Akaun 1, caruman baharu yang diterima daripada ahli-ahli yang terlibat akan dikreditkan ke dalam Akaun 1 sepenuhnya sehingga keseluruhan amaun pengeluaran yang diambil daripada Akaun 1 diganti semula. Setelah itu, pecahan caruman akan kembali kepada 70 peratus untuk Akaun 1 dan 30 peratus untuk Akaun 2.

Perkhidmatan khidmat nasihat

KWSP juga menyedari bahawa ahli KWSP perlu dibekalkan dengan pengetahuan kewangan supaya mereka mampu merancang kewangan dan mengurus simpanan persaraan dengan baik. Sehubungan itu, KWSP telah memperkenalkan *Retirement Advisory Service (RAS)* sejak tahun 2014 yang bertujuan untuk memberi khidmat nasihat persaraan secara percuma kepada ahli dalam meningkatkan kesedaran dan pengetahuan berkaitan kepentingan perancangan persaraan dan kewangan.

Panduan Perbelanjaan Belanjawanku

KWSP juga telah melancarkan Belanjawanku, satu panduan perbelanjaan minimum bulanan atas kategori dan perkhidmatan untuk pelbagai isi rumah. Belanjawanku boleh digunakan untuk merancang perbelanjaan peribadi dan keluarga. Sebagai projek perintis, Belanjawanku 2019 dikeluarkan berdasarkan pola perbelanjaan isi rumah di Lembah Klang. Panduan Belanjawanku ini telah diperluaskan kepada bandar-bandar utama di negeri-negeri yang lain pada tahun 2021.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. SHAHRUDDIN BIN MD. SALLEH
[SRI GADING]**

TARIKH : 24 NOVEMBER 2021

SOALAN

DATUK DR. SHAHRUDDIN BIN MD. SALLEH [SRI GADING] minta **MENTERI KANAN PENDIDIKAN** menyatakan apakah inisiatif Kementerian dalam membendung kes gangguan seksual yang berlaku di sekolah.

JAWAPAN

Tuan Yang di-Pertua,

KPM sentiasa komited untuk memastikan persekitaran sekolah adalah selamat. Bagi pencegahan gangguan seksual di sekolah, KPM melalui perkhidmatan bimbingan dan kaunseling melaksanakan intervensi dengan menggunakan Modul Intervensi Jenayah Seksual Kanak-Kanak di Sekolah (IHSAN). Modul ini antara lain, memberi pemahaman serta meningkatkan kesedaran murid berkaitan jenayah seksual.

Program kesedaran berterusan turut dilaksanakan oleh KPM dengan kerjasama agensi kerajaan atau bukan kerajaan dalam menyebarkan maklumat psikopendidikan, kesihatan reproduktif dan ancaman gangguan seksual.

Sekiranya berlaku sebarang kejadian gangguan seksual melibatkan murid, guru bimbingan dan kaunseling akan memainkan peranan untuk memberi sokongan kepada murid melalui sesi kaunseling bagi memastikan kesejahteraan, kesihatan, keselamatan serta kebajikan murid terjaga.

Selain itu, Pegawai Perhubungan Sekolah (PPS) dari Polis Diraja Malaysia (PDRM) berperanan memantau keselamatan murid dan membantu menangani salah laku disiplin termasuk gangguan seksual di sekolah. PPS turut mengadakan lawatan ke sekolah sekurang-kurangnya dua kali sebulan bagi memberikan ceramah berkaitan pencegahan jenayah kepada murid dan juga sebaran maklumat di papan kenyataan PPS yang disediakan di semua sekolah.

KPM yakin inisiatif yang dilaksanakan ini dapat membantu mengurangkan salah laku disiplin termasuk gangguan seksual dalam memperkukuh persekitaran sekolah yang selamat.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 24 NOVEMBER 2021 (RABU)

SOALAN

TUAN FONG KUI LUN [BUKIT BINTANG] minta **MENTERI KEWANGAN** menyatakan jumlah wang Malaysia yang dibawa keluar negeri sepanjang 2020 dan 2021 dalam pelbagai tujuan dan levi yang dikutip dan sejauh mana kehilangan memberi kesan ke atas kutipan hasil negara.

JAWAPAN

Tan Sri Yang di-Pertua,

Pada tahun 2020, aliran wang keluar Malaysia bagi akaun primer dan sekunder adalah berjumlah 112.3 bilion ringgit. Ini merangkumi transaksi seperti bayaran pampasan pekerja berjumlah 14.1 bilion ringgit, serta pendapatan pelaburan sebanyak 68.4 bilion ringgit, termasuk penghantaran balik keuntungan dan dividen oleh pelabur asing di Malaysia.

Sementara itu, aliran wang keluar negara bagi tempoh Januari hingga September 2021 adalah sebanyak 103.2 bilion ringgit. Ini merangkumi transaksi berjumlah 80.9 bilion ringgit yang meliputi bayaran bagi pampasan pekerja berjumlah 9.7 bilion ringgit dan bayaran pendapatan pelaburan bernilai 71.2 bilion ringgit.

Tan Sri Yang di-Pertua,

Untuk makluman juga, jumlah kutipan hasil daripada levi keuntungan luar biasa ke atas buah kelapa sawit, levi kenderaan barang, levi pelepasan dan levi pekerja asing adalah berjumlah 2.2 bilion ringgit bagi tahun 2020.

Jumlah ini adalah sebanyak 1 peratus daripada jumlah keseluruhan kutipan hasil Kerajaan Persekutuan. Walaupun ini dilihat kecil dalam menyumbang kepada kutipan hasil negara, namun ia masih membantu dalam membiayai perbelanjaan operasi Kerajaan. Setiap kutipan akan dimasukkan ke dalam Kumpulan Wang Disatukan, dan disalurkan kepada perbelanjaan seperti emolumen, bayaran khidmat hutang dan persaraan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
(SEKIJANG)**

TARIKH : 24 NOVEMBER 2021 (RABU)

SOALAN

**PUAN HAJAH NATRAH BINTI ISMAIL (SEKIJANG) minta MENTERI
KANAN PENDIDIKAN menyatakan :-**

- (a) harga, jumlah dan syarikat pembekal RTK-Antigen yang akan diedarkan kepada semua sekolah di seluruh negara ; dan
- (b) sejauh mana kekerapan murid-murid dan guru perlu menjalani ujian saringan COVID-19 dengan menggunakan kaedah RTK-Antigen ini.

JAWAPAN

Tuan Yang di-Pertua,

Kementerian Pendidikan Malaysia (KPM) telah membuat perolehan sebanyak 800,000 unit kit ujian saringan sendiri COVID-19 dengan kos keseluruhan berjumlah RM9.72 juta. Kit ujian ini dibekalkan oleh Syarikat Tree Med Sdn. Bhd., Syarikat Neoscience Sdn. Bhd. dan Syarikat Global Science Sdn. Bhd. Semua kit ujian saringan sendiri COVID-19 ini telah diedarkan ke semua Pejabat Pendidikan Daerah (PPD) dan Jabatan Pendidikan Negeri (JPN) pada 25 September 2021.

Untuk makluman Ahli Yang Berhormat, bagi murid yang kembali ke sekolah asrama sepenuhnya, mereka perlu menjalani ujian saringan COVID-19 dengan menggunakan kit ujian sendiri COVID-19 sebanyak 3 kali, iaitu semasa pendaftaran masuk, hari ke-6 dan hari ke-14 berada di asrama. Bagi murid asrama harian pula, ujian saringan COVID-19 menggunakan kit ujian sendiri akan dilaksanakan semasa pendaftaran masuk. Selain itu, kit ujian sendiri disediakan bagi kegunaan sekolah harian untuk membuat saringan awal sekiranya terdapat murid yang menunjukkan gejala ketika di sekolah.

Pembekalan kit ujian saringan sendiri COVID-19 ini hanya untuk kegunaan murid sahaja dan bukan untuk kegunaan guru. Bagi guru yang telah lengkap divaksin, mereka tidak perlu menjalani ujian saringan COVID-19. Manakala, bagi guru yang tidak lengkap atau menolak vaksin, guru tersebut perlu hadir ke sekolah dan memastikan agar:

- i) garis panduan dan arahan yang dikeluarkan oleh KPM dipatuhi;
- ii) sentiasa memakai pelitup muka berganda dan pelindung muka;
- iii) tidak dibenarkan melaksanakan pengajaran dan pembelajaran secara bersemuka; dan
- iv) tidak berada di bilik atau kawasan yang sama dengan murid atau warga sekolah yang telah menerima vaksin lengkap.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : DR LEE BOON CHYE [GOPENG]

TARIKH : 24 NOVEMBER 2021 (RABU)

SOALAN

minta **MENTERI KOMUNIKASI DAN MULTIMEDIA** menyatakan rancangan Kementerian untuk pelaksanaan 5G.

JAWAPAN

Tuan Yang Dipertua,

Untuk makluman Ahli Yang Berhormat, teknologi 5G telah mula diperkenalkan di Malaysia melalui Projek Demonstrasi 5G yang dilancarkan pada tahun 2019, di mana sebanyak 71 kes kegunaan dengan jumlah pelaburan sektor komersil bernilai RM131 juta dijalankan di 50 tapak stesen pengkalan 5G di Kedah, Pulau Pinang, Selangor, Terengganu dan Wilayah Persekutuan Kuala Lumpur.

Projek Demonstrasi 5G ini merangkumi sembilan (9) sektor industri iaitu bandar pintar, hiburan/media, minyak dan gas, pelancongan, pembuatan dan pemprosesan, pendidikan, pengangkutan pintar, penjagaan kesihatan digital dan pertanian.

Projek Demonstrasi 5G ini adalah bagi membolehkan rangkaian dan perkhidmatan 5G yang menyeluruh dan berimpak tinggi dapat dirancang dengan mengambilkira peluasan rangkaian gentian optik dan 4G di bawah JENDELA.

Bagi merealisasikan Aspirasi Negara, Rangka Tindakan Ekonomi Digital Malaysia (MyDigital) yang diumumkan pada 19 Februari 2021 juga telah menggariskan rancangan untuk mempercepat pencapaian Malaysia sebagai negara ekonomi maju daripada segi teknologi. Sehubungan itu, ketersediaan 5G telah dijadikan salah satu komponen utama bagi menyokong rancangan tersebut. Justeru, Kerajaan telah mengambil pendekatan untuk mempercepatkan pelaksanaan 5G ke suku keempat 2021 berbanding perancangan asal pada tahun 2023. Kerajaan juga telah mengenalpasti keperluan spektrum yang berkaitan bagi membolehkan rangkaian ini dapat dibina dengan segera.

Kerja-kerja pembangunan rangkaian 5G telah pun dimulakan pada September 2021. Ketersediaan rangkaian 5G ini akan dicapai secara berperingkat bermula penghujung 2021 di Putrajaya, Cyberjaya dan Kuala Lumpur, dan akan diperluaskan ke kawasan lain di seluruh negara bermula tahun 2022. DNB telah mensasarkan sehingga 80% kawasan berpenduduk akan mendapat liputan 5G dalam tempoh 3 tahun iaitu pada tahun 2024. Jika dibandingkan dengan pelaksanaan 3G dan 4G dahulu, syarikat-syarikat telekomunikasi mengambil hampir 8 tahun untuk mencapai tahap liputan 80%. Pelaksanaan yang pantas ini akan mengurangkan risiko peluasan jurang digital dalam masyarakat.

Dalam masa yang sama, pelan JENDELA telah mensasarkan peluasan jaringan gentian optik kepada 83% premis dan peningkatan liputan perkhidmatan 4G di kawasan berpenduduk kepada 96.9% pada tahun 2022. Rangkaian gentian optik dan liputan perkhidmatan 4G yang meluas ini akan mengukuhkan asas rangkaian dan membantu pelaksanaan 5G ke seluruh negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : DATO' SERI ANWAR BIN IBRAHIM
[PORT DICKSON]**

TARIKH : 24 NOVEMBER 2021 (RABU)

SOALAN

DATO' SERI ANWAR BIN IBRAHIM [PORT DICKSON] minta **MENTERI KEWANGAN** menyatakan jumlah hutang isi rumah semasa dan nisbah hutang isi rumah kepada Keluaran Dalam Negara Kasar (KDNK).

JAWAPAN

Tuan Yang di-Pertua,

Pada akhir Jun 2021, secara agregat, hutang isi rumah bernilai 1,335.4 bilion ringgit atau berada pada tahap 89.6% kepada KDNK. Nisbah hutang ini telah menurun daripada 93.2% pada Disember 2020.

Walaupun nilai hutang isi rumah ini masih besar, apa yang penting ialah profil hutang berkenaan. Sebahagian besar daripada hutang isi rumah di negara ini bertujuan untuk mengumpul kekayaan. Sebagai contoh, sekitar 70% daripada pinjaman dalam separuh pertama tahun ini diberi kepada peminjam daripada golongan berpendapatan sederhana dan tinggi dengan 40% daripada pinjaman berkenaan adalah untuk pembelian harta tanah dan 20% untuk pinjaman kenderaan. Hal ini didorong oleh pelbagai insentif pemilikan rumah yang ditawarkan oleh Kerajaan dan sektor swasta serta insentif cukai jualan dan perkhidmatan bagi pembelian kenderaan bermotor. Di samping itu, nisbah aset kewangan isi rumah kepada KDNK berada pada paras 195%, iaitu nilai aset isi rumah adalah dua kali ganda berbanding hutang isi rumah. Situasi ini menunjukkan isi rumah negara secara keseluruhannya masih berada dalam keadaan *solvent* dengan izin.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM (BERUAS)

TARIKH : 24 NOVEMBER 2021 (RABU)

SOALAN

DATO' NGEH KOO HAM (BERUAS) minta **MENTERI KANAN PENDIDIKAN** menyatakan bagaimana keputusan Sijil Pelajaran Malaysia (SPM) untuk tahun 2020 bertambah baik sungguhpun murid-murid tidak dapat menghadiri kelas untuk beberapa bulan akibat COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) memaklumkan bahawa pencapaian keseluruhan calon Sijil Pelajaran Malaysia (SPM) 2020 adalah meningkat dan lebih baik berbanding tahun 2019. Gred Purata Nasional (GPN) bagi tahun 2020 adalah 4.80 berbanding 4.86 pada tahun 2019, iaitu perbezaan sebanyak 0.06.

Kejayaan ini merupakan hasil usaha yang berterusan dan komitmen padu daripada semua pihak yang terlibat termasuk calon, guru, pentadbir sekolah, ibu bapa, persatuan ibu bapa dan guru, serta masyarakat. Walaupun berdepan dengan situasi pandemik COVID-19 yang sangat mencabar dan sekolah terpaksa ditutup, kelangsungan pembelajaran calon peperiksaan SPM 2020 diberi keutamaan agar pengajaran dan pembelajaran (PdP) dapat diteruskan dan persediaan rapi secara intensif juga dapat dilaksanakan.

Untuk makluman Ahli Yang Berhormat, KPM telah melaksanakan satu pelan komprehensif bagi membantu calon bersedia sepenuhnya sebelum menduduki peperiksaan SPM 2020.

KPM telah membuat pindaan pada Takwim Penggal dan Cuti Persekolahan Tahun 2020 dengan memaksimumkan tempoh hari persekolahan. Apabila sekolah dibuka pada 24 Jun 2020, calon peperiksaan SPM telah diberi keutamaan hadir ke sekolah untuk PdP secara bersemuka. Begitu juga apabila sekolah dibuka semula pada 20 Januari 2021.

Secara keseluruhannya, calon peperiksaan SPM 2020 telah menghadiri sesi persekolahan secara bersemuka selama 155 hari berbanding dengan sesi persekolahan tahun-tahun sebelumnya yang berlangsung sekitar 200 hari.

Selain itu, tarikh peperiksaan SPM 2020 yang asalnya dijadualkan pada Oktober 2020 telah dijadualkan semula sebanyak 3 kali sebelum peperiksaan akhirnya dilaksanakan dalam dua sesi, iaitu sesi pertama pada 22 Februari hingga 25 Mac 2021 dan sesi kedua pada 6 hingga 23 April 2021. Pelanjutan sesi persekolahan dan penjadualan semula tarikh peperiksaan telah memberi ruang dan peluang kepada calon untuk membuat persediaan rapi dan bersedia sepenuhnya termasuk dari segi emosi bagi memastikan calon menduduki peperiksaan dalam keadaan yang paling sihat dan penuh bersemangat.

Bagi membolehkan peperiksaan SPM 2020 dapat dilaksanakan secara teratur dan lancar, dengan mengambil kira keselamatan murid, guru serta petugas peperiksaan, pelan strategik utama KPM ialah mengeluarkan Garis Panduan Pengurusan dan Pengoperasian Sekolah Dalam Norma Baharu. Garis panduan ini merangkumi panduan pengurusan pentaksiran pusat dan peperiksaan awam kepada pentaksir dan petugas peperiksaan serta pegawai pengurus peperiksaan di jabatan pendidikan negeri dan pejabat pendidikan daerah bagi memastikan keadaan yang selesa dan selamat dari penularan COVID-19.

Bagi memastikan kelangsungan pengajaran dan pembelajaran (PdP) dalam kalangan calon peperiksaan, KPM telah melaksanakan pengajaran dan pembelajaran di rumah (PdPR) melalui tiga pendekatan, iaitu secara dalam talian, luar talian dan *off-site* mengikut kesesuaian guru dan murid. KPM turut menyediakan pelantar *Digital Educational Learning Initiative Malaysia* (DELIMa) sebagai pusat rujukan sehenti untuk calon dan guru mendapatkan pelbagai bahan sokongan agar calon dapat memperkukuh pemahaman dalam kandungan mata pelajaran yang perlu dipelajari.

Selain itu, KPM menyediakan rancangan TV Pendidikan melalui saluran DidikTV KPM, TV Okey RTM dan Tutor TV Astro. Rancangan seperti *Road to Success* dan SUKSES SPM 2021 tersebut memfokuskan kepada kandungan mata pelajaran Tingkatan Lima bagi membantu calon menguasai kandungan kurikulum sebelum menduduki peperiksaan SPM 2020.

Pihak sekolah dan guru turut mengambil inisiatif bagi membantu calon yang tiada peranti dan capaian internet dengan melaksanakan PdP melalui penggunaan buku teks. Buku aktiviti pula digunakan untuk membuat latihan ulangkaji. Guru juga menyediakan modul PdP dan membuat serahan bahan tersebut kepada calon.

KPM yakin, kebersamaan semua pihak yang mendukung segala usaha dan inisiatif yang dilaksanakan telah memberikan impak yang positif kepada pencapaian calon dalam peperiksaan SPM 2020.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 24 NOVEMBER 2021 (RABU)

SOALAN

DATO' JOHARI BIN ABDUL (SUNGAI PETANI) minta **MENTERI KANAN PENDIDIKAN** menyatakan adakah Kementerian bercadang untuk mewajibkan guru-guru yang akan dinaikkan pangkat atau gred mesti mengikuti kursus-kursus tambahan seperti bidang pengurusan, kewangan atau lain-lain bidang selain dari bidang yang mereka terlibat dalam tugas mereka.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan peluang kenaikan pangkat untuk guru. Kenaikan pangkat guru adalah tertakluk kepada syarat yang ditetapkan oleh Lembaga Kenaikan Pangkat Perkhidmatan Pelajaran (LKPPP). Pada masa ini, urusan kenaikan pangkat guru sama ada melalui pemangkuan atau kenaikan secara *Time-Based* Berasaskan Kecemerlangan (TBBK) tidak terikat dengan syarat lulus kursus tertentu kecuali bagi jawatan berikut:

- i) Pegawai Gred Utama C diwajibkan mengikuti dan lulus Kursus ALMP (Advanced Leadership and Management Programme) anjuran Jabatan Perkhidmatan Awam; dan

- ii) Guru Cemerlang dan Pensyarah Cemerlang Gred Khas C diwajibkan mengikuti dan lulus Kursus Pengupayaan Guru Cemerlang/Pensyarah Cemerlang Gred Khas C anjuran Institut Aminuddin Baki.

Walaupun bagaimanapun, bagi urusan penempatan ke jawatan Pengetua dan Guru Besar, KPM telah mewajibkan calon untuk mengikuti dan lulus Program Kelayakan Profesional Pemimpin Pendidikan Kebangsaan (NPQEL) anjuran Institut Aminuddin Baki. Program ini diwajibkan supaya pentadbir sekolah mempunyai kompetensi dalam aspek kepimpinan, pengurusan dan kewangan.

Selain itu, guru turut berpeluang untuk mengikuti pelbagai program kursus dan latihan yang ditawarkan oleh KPM. Guru dan warga KPM perlu memenuhi bilangan hari latihan sekurang-kurangnya 5 hari setahun berdasarkan ketetapan Panel Pembangunan Sumber Manusia Latihan (PPSML) KPM. Kursus yang diikuti oleh guru dan warga KPM adalah selaras dengan objektif untuk menjadikan KPM sebagai sebuah organisasi pembelajaran yang cemerlang berteraskan pembangunan kompetensi dan pembelajaran berterusan.

Sehingga kini, KPM akan meneruskan dasar semasa kenaikan pangkat guru tanpa mewajibkan kursus tambahan. Oleh yang demikian, KPM tidak bercadang untuk mewajibkan guru untuk mengikuti kursus-kursus tambahan selain dari bidang yang mereka terlibat dalam tugas mereka.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : YB PUAN TERESA KOK SUH SIM (SEPUTEH)

TARIKH : 24 NOVEMBER 2021 (RABU)

SOALAN

PUAN TERESA KOK SUH SIM [SEPUTEH] minta MENTERI PENGANGKUTAN menyatakan sebab beliau enggan mengadakan perjumpaan dengan Majlis Jawatankuasa Penasihat Teknikal Penerbangan (NACC) sejak YB Ayer Hitam pegang jawatan Menteri sejak 18 bulan yang lepas. Macam mana YB Menteri mendapat maklum balas daripada kesatuan sekerja syarikat penerbangan sekiranya beliau tidak hadir mesyuarat NACC.

JAWAPAN

Tuan Yang di-Pertua,

Semenjak negara dilanda pandemik COVID-19, Mesyuarat National Aviation Consultative Council - NACC terpaksa ditangguhkan bagi mengekang penularan pandemik tersebut. Sungguhpun demikian, Kerajaan tidak sama sekali mengabaikan keperluan pemain-pemain industri serta para pekerja sektor penerbangan awam negara yang terjejas teruk akibat daripada pandemik COVID-19.

Kerajaan melalui MAVCOM secara berterusan telah mengadakan beberapa siri perjumpaan dengan pemain-pemain industri penerbangan termasuk syarikat-syarikat penerbangan, operator lapangan terbang, perkhidmatan pengendalian darat bagi mendapatkan maklum balas berhubung status semasa industri penerbangan, isu dan masalah yang dihadapi serta cadangan pemulihan industri penerbangan semasa dan pasca pandemik.

Dalam hubungan ini, berdasarkan maklumbalas-maklumbalas yang diterima, Kementerian Pengangkutan dan MAVCOM telah membentangkan 3 kertas pembentangan kepada Mesyuarat Majlis Tindakan Ekonomi (*Economic Action Council* – EAC) yang dipengerusikan oleh YAB Perdana Menteri pada 12 Jun 2020, 11 November 2020 dan 30 September 2021.

Pembentangan kertas tersebut adalah bertujuan untuk memaklumkan EAC berhubung status terkini sektor penerbangan negara, inisiatif yang dilaksanakan oleh Kerajaan dan agensi di bawahnya bagi menangani impak pandemik COVID-19 serta cadangan-cadangan pemulihan untuk tempoh jangka masa pendek, sederhana dan panjang.

Di antara isu-isu yang dibangkitkan adalah termasuk isu pekerja sektor penerbangan. Berasaskan kepada maklumbalas tersebut juga, Kerajaan melalui Belanjawan 2021 antara lain telah mengumumkan

SOALAN NO : 35

peruntukan sebanyak RM50 juta untuk program latihan dan penempatan semula bagi 8,000 kakitangan dari syarikat penerbangan di Malaysia.

Kementerian Pengangkutan sentiasa terbuka dalam menerima sebarang cadangan daripada semua pemain industri penerbangan termasuk mana-mana kesatuan sekerja syarikat penerbangan melalui pelbagai medium.

Kementerian Pengangkutan akan terus bekerjasama dengan pihak industri dan pihak-pihak berkepentingan bagi memastikan industri penerbangan awam negara kembali berdaya saing seiring dengan pembukaan semula sektor-sektor ekonomi yang lain.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
(SEKIJANG)**

TARIKH : 24 NOVEMBER 2021 (RABU)

SOALAN

PUAN HAJAH NATRAH BINTI ISMAIL (SEKIJANG) minta **MENTERI KANAN PENDIDIKAN** menyatakan perkembangan terkini berkaitan program sarapan percuma dan program susu sekolah untuk murid-murid sekolah rendah di seluruh negara.

JAWAPAN

Tuan Yang di-Pertua,

Kementerian Pendidikan Malaysia (KPM) akan terus melaksanakan program Rancangan Makanan Tambahan (RMT) dan Program Susu Sekolah (PSS) kepada murid B40 yang layak di sekolah rendah. Perkara ini adalah selaras dengan keputusan Mesyuarat Jemaah Menteri (MJM) pada 15 Januari 2020 untuk tidak meneruskan Program Sarapan Pagi (PSP) dan Program Rancangan Makanan Tambahan (RMT) diteruskan dengan penambahbaikan.

Untuk makluman Ahli Yang Berhormat, KPM telah menambah baik pelaksanaan program RMT dengan pemberian susu pada setiap hari berbanding 2 kali seminggu sebelum ini. Melalui pelaksanaan ini, murid dibekalkan dengan keperluan nutrien lengkap yang diperlukan bagi membantu pertumbuhan yang sihat sebagaimana yang dicadangkan oleh Kementerian Kesihatan Malaysia.

KPM yakin pelaksanaan RMT memberi kesan baik kepada murid sekolah rendah khususnya dari luar bandar dan golongan berpendapatan rendah bagi memperbaiki keadaan kesihatan, fizikal dan amalan pemakanan yang sihat.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 24 NOVEMBER 2021 (RABU)

SOALAN

TUAN TAN KOK WAI [CHERAS] minta **MENTERI PENGAJIAN TINGGI** menyatakan bagaimana Kerajaan dapat membantu membolehkan para pelajar Malaysia untuk meneruskan pengajian mereka di negara-negara yang masih menutup sempadan mereka kepada orang asing kerana pandemik COVID-19; dan juga bagaimana untuk membolehkan pelajar asing meneruskan pengajian mereka di Malaysia walaupun sempadan kita masih belum dibuka untuk mereka.

JAWAPAN

Tan Sri Yang di-Pertua,

Kementerian Pengajian Tinggi (KPT) amat prihatin dengan kebajikan pelajar-pelajar Malaysia yang ingin meneruskan pengajian mereka di luar negara terutamanya di negara-negara yang masih menutup sempadan mereka kerana pandemik COVID-19. KPT melalui Pejabat Education Malaysia atau Pejabat Kedutaan Malaysia di luar negara sentiasa bersedia untuk membantu menyelesaikan isu atau permasalahan yang timbul terutamanya yang berkaitan dengan urusan kemasukan pelajar Malaysia ke negara luar.

Dalam hubungan ini, rundingan strategik dengan pejabat kedutaan asing di Malaysia dilaksanakan dari semasa ke semasa berdasarkan kes. Contohnya dalam menyelesaikan isu larangan masuk pelajar Malaysia

yang telah tamat tempoh visa pelajar atau Izin Tinggal Terbatas (ITAS) ke Indonesia. Hasil rundingan Pejabat Education Malaysia Indonesia dengan Kementerian Pendidikan dan Kebudayaan Republik Indonesia serta Pejabat Kedutaan Besar Republik Indonesia, isu ini telah berjaya diselesaikan.

Bagi maksud pelajar asing yang ingin meneruskan pengajian mereka di Malaysia, suka saya maklumkan di sini bahawasanya sempadan Malaysia telah pun dibuka kepada pelajar antarabangsa selaras dengan Pengumuman Pengoperasian Institusi Pendidikan Tinggi pada 14 September 2021 yang lalu.

Kebenaran memasuki Malaysia bagi pelajar antarabangsa adalah merangkumi tiga kategori seperti yang berikut:

- (a) Warganegara United Kingdom yang sebelum ini disekat kemasukannya;
- (b) Pelajar yang mengikuti program Mobiliti dan *Edutourism*; dan
- (c) Tanggungan sah bagi pelajar yang berhasrat membawa keluarga bersama-sama.

Selaras dengan itu juga, pelajar antarabangsa yang ingin memasuki Malaysia perlu lengkap divaksinasi dan memenuhi syarat-syarat seperti yang berikut:

- (a) Berdaftar dengan Education Malaysia Global Services (EMGS) sebelum diberikan kebenaran masuk ke Malaysia oleh Jabatan Imigresen Malaysia;
- (b) Menjalani ujian swab RT-PCR sebelum tiba di Malaysia; serta
- (c) Menjalani saringan kesihatan dan kuarantin di lokasi yang telah ditetapkan setibanya di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KE-14**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 24 NOVEMBER 2021 (RABU)

SOALAN

TUAN AHMAD FADHLI BIN SHAARI [PASIR MAS] minta **MENTERI KEWANGAN** menyatakan status terkini tuntutan bayaran royalti tunai oleh Kerajaan Negeri Kelantan.

JAWAPAN

Untuk makluman Yang Berhormat dan Dewan Yang Mulia ini,

Tiada Bayaran Tunai dibuat oleh PETRONAS, khususnya bagi pengeluaran petroleum kepada mana-mana negeri di Semenanjung Malaysia termasuk negeri Kelantan. Ini disebabkan oleh kedudukan medan pengeluaran petroleum yang beroperasi adalah di luar perairan negeri Kelantan.

Namun begitu, memandangkan lokasi medan petroleum berdekatan dengan perairan negeri Kelantan, maka Kerajaan Persekutuan membuat pembayaran dalam bentuk Wang Ehsan bagi melaksanakan projek dan program untuk manfaat rakyat di negeri tersebut.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
[BATU KAWAN]**

TARIKH : 24 NOVEMBER 2021 (RABU)

SOALAN

PUAN KASTHURIRAANI A/P PATTO [BATU KAWAN] minta **MENTERI PEMBANGUNAN WANITA, KELUARGA DAN MASYARAKAT** menyatakan berapakah kes keganasan rumah tangga yang dilaporkan melalui semua talian dan saluran bagi tahun 2018, 2019, 2020 dan sehingga kini mengikut pecahan bulan dan negeri dan bilangan kes NFA, dituduh di mahkamah, pertuduhan ditarik balik, pelaku dilepaskan tanpa dibebaskan (DNAA), pelaku disabitkan kesalahan selepas perbicaraan penuh dan pelaku mengaku salah dan dihukum.

JAWAPAN

Tuan Yang di-Pertua,

Bagi menangani isu keganasan rumah tangga, Kementerian Pembangunan Wanita, Keluarga dan Masyarakat (KPWKM) mengambil tindakan di bawah Akta Keganasan Rumah Tangga 1994 [Akta 521]. Menerusi akta ini, Kerajaan memperuntukkan perlindungan undang-undang dalam situasi keganasan rumah tangga. Tindakan segera akan dijalankan bersama agensi-agensi penguatkuasaan seperti Polis Diraja Malaysia (PDRM), mahkamah dan agensi yang berkaitan bagi memastikan segala bentuk keganasan rumah tangga dapat dibendung.

Berdasarkan statistik Jabatan Kebajikan Masyarakat, jumlah kes keganasan rumah tangga bagi tahun 2018 hingga 2021 ialah sebanyak **3,157 kes**. Jumlah kes keganasan rumah tangga mengikut jantina dari tahun 2018 hingga Ogos 2021 adalah seperti berikut:

Negeri	2018			2019			2020			Ogos 2021			Jumlah		JUMLAH
	L	P	J	L	P	J	L	P	J	L	P	J	L	P	
Selangor	15	114	129	27	135	162	38	284	322	13	262	275	93	795	888
Kedah	7	67	74	1	73	74	15	110	125	8	67	75	31	317	348
Kelantan	0	12	12	0	34	34	14	149	163	0	88	88	14	283	297
Pahang	4	87	91	7	97	104	4	33	37	4	47	51	19	264	283
Pulau Pinang	7	58	65	1	46	47	11	77	88	8	57	65	27	238	265
Perak	0	22	22	0	36	36	2	59	61	4	52	56	6	169	175
Johor	4	10	14	4	31	35	10	44	54	5	54	59	23	139	162
Negeri Sembilan	10	27	37	2	28	30	1	41	42	0	43	43	13	139	152
Sabah	0	52	52	1	39	40	0	28	28	0	29	29	1	148	149
Sarawak	0	19	19	1	46	47	0	37	37	2	40	42	3	142	145
W.P. Kuala Lumpur	0	27	27	2	34	36	9	31	40	9	14	23	20	106	126
Melaka	2	41	43	0	21	21	2	29	31	2	22	24	6	113	119
Terengganu	0	11	11	0	4	4	2	4	6	0	0	0	2	19	21
W.P. Putrajaya	1	5	6	0	3	3	0	6	6	0	3	3	1	17	18
Perlis	0	0	0	0	0	0	0	5	5	0	1	1	0	6	6
W.P. Labuan	0	0	0	0	0	0	0	2	2	0	1	1	0	3	3
Jumlah	50	552	602	46	627	673	108	939	1,047	55	780	835	259	2,898	3,157
Jumlah Keseluruhan	602			673			1,047			835			3,157		

• Nota: L – Lelaki

P – Perempuan

J - Jumlah

SOALAN NO. : 39

Berdasarkan statistik **Talian Kasih 15999**, jumlah kes keganasan rumah tangga bagi tahun 2018 hingga 2021 ialah sebanyak **2,650** kes. Jumlah kes keganasan rumah tangga mengikut jantina dan negeri dari tahun 2018 hingga 31 Oktober 2021 adalah seperti berikut:

Negeri	2018			2019			2020			Okt 2021			Jumlah		Jumlah Keseluruhan
	L	P	J	L	P	J	L	P	J	L	P	J	L	P	
Selangor	0	301	301	5	89	94	6	263	269	11	307	318	22	960	982
Kedah	0	36	36	0	13	13	1	51	52	0	55	55	1	155	156
Kelantan	0	15	15	0	5	5	1	17	18	1	21	22	2	58	60
Pahang	0	20	20	0	7	7	0	20	20	0	31	31	0	78	78
Pulau Pinang	0	42	42	1	5	6	1	41	42	1	45	46	3	133	136
Perak	0	45	45	1	17	18	1	50	51	4	71	75	6	183	189
Johor	1	81	82	2	23	25	1	80	81	5	77	82	9	261	270
Negeri Sembilan	0	30	30	0	15	15	0	31	31	2	52	54	2	128	130
Sabah	0	11	11	0	2	2	1	21	22	2	25	37	3	69	72
Sarawak	0	11	11	0	5	5	1	11	12	0	20	20	1	47	48
W.P. Kuala Lumpur	0	151	151	0	34	34	2	98	100	6	89	95	8	372	380
Melaka	0	30	30	0	6	6	0	14	14	2	21	23	2	71	73
Terengganu	0	9	9	1	4	5	0	15	15	1	17	18	2	45	47
W.P. Putrajaya	0	7	7	0	0	0	0	6	6	0	6	6	0	19	19
Perlis	0	1	1	0	2	2	0	3	3	0	3	3	0	9	9
W.P. Labuan	0	0	0	0	0	0	0	0	0	0	1	1	0	1	1
Jumlah	1	790	791	10	227	237	15	721	736	35	851	886	61	2,589	2,650
Jumlah Keseluruhan	791			237			736			886			2,650		

• Nota: L – Lelaki

P – Perempuan

J - Jumlah

Tuan Yang di-Pertua,

Menurut Statistik Keganasan Rumah Tangga dari Polis Diraja Malaysia (PDRM) sebanyak 1,513 kes Tiada Tindakan Lanjut (*No Further Action*, NFA) dicatatkan antara tahun 2018 sehingga September 2021.

Pada tahun 2018 mencatatkan sebanyak 628 kes NFA, 324 kes NFA pada tahun 2019, 135 kes NFA pada tahun 2020 dan sehingga September 2021 mencatatkan sebanyak 126 kes NFA bagi Kes Keganasan Rumah Tangga.

KONTINJEN POLIS	2018	2019	2020	Sept 2021
Perlis	14	19	1	3
Kedah	41	29	13	13
Pulau Pinang	42	46	5	5
Perak	72	38	9	9
Selangor	154	102	21	21
Kuala Lumpur	18	26	6	6
Negeri Sembilan	67	39	4	4
Melaka	1	12	5	5
Johor	38	102	16	31
Pahang	42	45	3	3
Terengganu	15	18	7	7
Kelantan	60	35	9	9
Sabah	53	45	5	5
Sarawak	11	68	31	5
JUMLAH	628	624	135	126
JUMLAH KESELURUHAN	1,513			

Tuan Yang di-Pertua

Menurut statistik dari Pejabat Ketua Pendaftar Mahkamah Persekutuan, sebanyak 4,649 orang telah dituduh di mahkamah. Pada masa yang sama sebanyak 448 aduan/pertuduhan telah ditarik balik, seramai 1,264 orang telah dibebaskan tanpa dilepaskan (DNAA) dan 72 telah disabitkan kesalahan selepas dibicarakan serta seramai 2,180 pelaku telah mengaku kesalahan. Pecahan statistik PDRM adalah seperti berikut:

Tahun	Bilangan Kes Dituduh Di Mahkamah	Pertuduhan Ditarik Balik (<i>Withdraw</i>)	Kes DNAA	Sabitkan Selepas Bicara Penuh	OKT Mengaku Salah
2018	826	83	268	15	446
2019	1,119	125	355	33	567
2020	1,375	152	387	20	670
Okt 2021	1,329	88	254	4	497
JUMLAH KESELURUHAN	4,649	448	1,264	72	2,180

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
(PASIR MAS)**

TARIKH : 24 NOVEMBER 2021 (RABU)

SOALAN

TUAN AHMAD FADHLI BIN SHAARI (PASIR MAS) minta **MENTERI KANAN PENDIDIKAN** menyatakan berapa peruntukan yang disalurkan kepada sekolah-sekolah kebangsaan di bawah Kementerian Pendidikan Malaysia untuk tujuan penyelenggaraan bangunan bermula tahun 2016 sehingga 2021.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited kepada usaha menyediakan fasiliti bangunan dan kemudahan sekolah yang dapat berfungsi dengan baik, selamat dan kondusif.

Untuk makluman Ahli Yang Berhormat, KPM menyalurkan peruntukan untuk menyelenggara sekolah kebangsaan yang masih ekonomik dibaiki mengikut keutamaan berdasarkan skala dalam Skor Gred Impak yang disyorkan oleh Pejabat Pendidikan Daerah (PPD)/Jabatan Pendidikan Negeri (JPN)/Jabatan Kerja Raya (JKR). Penyaluran peruntukan penyelenggaraan kepada JPN/JKR adalah berdasarkan skop kerja penyelenggaraan yang telah ditetapkan oleh Kementerian.

Dalam tempoh 2016 hingga 2021, KPM telah membelanjakan peruntukan penyelenggaraan sebanyak RM2.309 bilion kepada sekolah kebangsaan di bawah KPM. pecahan peruntukan serta jumlah sekolah-sekolah kebangsaan yang telah diselenggara adalah seperti berikut:

TAHUN	BIL. SEKOLAH	JUMLAH PERUNTUKAN (RM-JUTA)
2016	4,010	158.10
2017	6,518	446.67
2018	6,010	404.62
2019	6,653	454.06
2020	5,510	402.70
2021	6,576	443.59
Jumlah Keseluruhan		2,309.74

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHAMADDIN BIN KETAPI
[LAHAD DATU]**

TARIKH : 24 NOVEMBER 2021 (RABU)

SOALAN

DATUK MOHAMADDIN BIN KETAPI [LAHAD DATU] minta **MENTERI KANAN PENDIDIKAN** menyatakan bilakah sekolah menengah agama di Parlimen Lahad Datu akan mula dibina, dan bantuan yang diberikan kepada pelajar sekolah agama di Sabah bagi melanjutkan pelajaran ke peringkat yang lebih tinggi.

JAWAPAN

Tuan Yang di-Pertua,

Untuk makluman Ahli Yang Berhormat, KPM mengambil kira pelbagai aspek sebelum sesebuah sekolah baharu dibina di atas tanah yang telah dirizabkan untuk tujuan pendidikan. Antara perkara yang diambil kira dalam mempertimbangkan pembinaan sesebuah sekolah baharu adalah seperti yang berikut:

- i. kesediaan tapak atau tanah;
- ii. bilangan dan kapasiti sekolah sedia ada yang berhampiran;
- iii. kepadatan penduduk di kawasan sekitar;
- iv. liputan kawasan tadahan penduduk (catchment area); dan
- v. perancangan pembangunan kawasan terlibat berdasarkan perbincangan bersama-sama Pihak Berkuasa Tempatan (PBT).

Merujuk kepada pertanyaan Ahli Yang Berhormat berhubung pembinaan sekolah menengah agama di Lahad Datu, KPM hendak memaklumkan bahawa terdapat sembilan buah Sekolah Menengah Kebangsaan Agama (SMKA), enam buah Sekolah Agama Bantuan Kerajaan (SABK) dan 58 buah Sekolah Menengah Kebangsaan (SMK) yang melaksanakan Kelas Aliran Agama (KAA) di negeri Sabah.

Dalam parlimen Lahad Datu terdapat enam SMK harian yang melaksanakan KAA dan menawarkan pakej mata pelajaran seperti di SMKA. Selain itu juga, terdapat dua buah SMKA yang berhampiran, iaitu SMKA Tun Sakaran, Semporna dan SMKA Tun Juhar, Sandakan yang mempunyai kemudahan asrama dan mampu menampung kapasiti kemasukan murid dari daerah sekitarnya termasuk dari kawasan Lahad Datu.

Justeru, pada masa kini tiada keperluan mendesak untuk membina sekolah menengah agama di Lahad Datu kerana sekolah sedia ada masih berupaya untuk menampung keperluan pendidikan sekolah agama bagi murid di kawasan tersebut.

Untuk makluman Ahli Yang Berhormat, KPM menyediakan penajaan bagi murid lepasan SPM dalam Program Pelajar Cemerlang (PPC) iaitu bidang Pendidikan Islam, Bahasa Arab, dan Qiraat dan al-Quran di Jordan. Model pengajian bagi program ini adalah selama 61 bulan yang merangkumi satu bulan Kursus Persediaan di Malaysia, 48 bulan pengajian di peringkat Ijazah Sarjana Muda di Jordan dan 12 bulan pada peringkat Program Diploma Pascasiswazah Pendidikan (PDPP) di Institut Pendidikan Guru Malaysia (IPGM).

Selain itu murid-murid sekolah agama juga berpeluang untuk mengikuti Program Ijazah Sarjana Muda Pendidikan (PISMP) selama empat tahun dan akan menerima bayaran Elaun Sara Hidup sebanyak RM430.00 sebulan dan belanja tambang pergi balik pada kadar maksimum RM500.00 sekali setahun.